


Homber y muher ta traha ariba e proyecto pa un cas pa e futuro Gobernador di Aruba. Asina por a nota un dama cu ta traha na Associated Architects, ta yuda den midimento di tereno. Mientras DIA-RIO a capta Sonia Croes den accion, ayeramainta personal di Wegenbouw a cuminsa dismantela e dak di cas bieo di Gobernador, cu pronto lo pasa pa historia.



AVENIDA JUAN ENRIQUE IRAUSQUIN

ORANJESTAD(AAN)—Den un carta cu e Secretario General di PPA, Dolfo Jansen, a manda pa Bestuurscollege di Aruba, e proposicion ta wordo haci pa cambia nomber di Boulevard for di e edificio di DOW te na Malmokweg, den Avenida Juan Enrique Irausquin, como homenaje na Difunto Juancho Irausquin. Mientras un que otro lo por tuma lugar den cuadro di conmemoracion di e di 23 aniversario di morto di Difunto Juancho Irausquin, PPA ta muestra ariba e labornan cu a wordo desempeña pa desaroyo di turismo di Aruba.

Den e carta ta wordo ilustra con for di momento cu automatizacion na Lago a haci cu un cantidad di trahador di e compania a keda sin trabao, Difunto Juancho Irausquin, cu vision pa futuro, a logra introduci y fomenta turismo na interes di Aruba.

Despues cu su partido a cuminsa forma parti di Gobierno Central, y el a bira Ministro di Finanzas, Difunto Juancho Irausquin por a desaroya su idean pa expansion di turismo na Aruba.

Mientras cu awor, 30 aña despues, turismo mester bolbe haya atencion, tanto di Pueblo como di Gobierno, PPA ta haya cu pensamentonan mester bolbe bay na Juancho Irausquin, cu introduccion di Avenida Juan Enrique Irausquin. mester bolbe bay na Juancho Irausquin, y cu nomancia su retirada.

COMISION TA STUDIA PROYECTO PA EXPLORACION Y REFINERIA

ORANJESTAD(AAN)—Segun informenan cu DIARIO a ricibi ayera di parti di e Consejero General di Bestuurscollege, señor Betico Croes, el a muestra cu tin un grupo interesa den Lago, pero den un forma combina cu e posibilidad di exploracion di petroleo.

Un proyecto lo a keda entrega pa e grupo aki, cu kende conversacionnan a wordo hiba. E proyecto actualmente ta den estudio cerca un grupo di trabao cu a keda forma, y cu mester bay aconseja Bestuurscollege den e materia aki.

Mucho detaye no a wordo duna ainda di e proyecto aki, cu pues ta den fase di estudio. Di tur forma e grupo lo ta interesa den un combinacion, esta refineria cu exploracion di azeta.

SHELL LO CERA NA DECEMBER

ORANJESTAD(AAN)—Informenan clave cu DIARIO a ricibi di fuentenan digno di credito, ta muestra cu pronto Shell lo bay anuncia su ciere. Aparentemente ya na Curacao tin hende na altura, cu na fin di e luna aki, Shell lo anuncia Gobierno Central, cu e ultimo dia di 1985, lo bira tambe e ultimo dia cu Shell ta forma parti di e historia economico di Curacao.

Shell ya ta tumando e pasonan pa yega na e anuncio oficial, segun informan-tenan a bisa, alegando, cu e hecho cu e compania a paraliza entrega di crudo for di Venezuela y tambe a haci cierto pasonan ariba tereno di operacion, ta indicacion clave cu e compania ta preparando pa ciere.

Shell lo kier duna Curacao seis luna di tempo pa prepara su mes pa reemplazo di e refineria y aparentemente den circulon alto di e compania ta biba e pensamiento cu den seis luna di tempo, por diversifica e economia di tal forma, cu parcialmente por reemplaza e refineria.

No mester exclui e posibilidad cu ya cierto mandatarionan clave a wordo poni na altura di e decision di Shell, cu pronto lo pone cartanan ariba mesa y anuncia su retirada, segun fuentenan hopi bon informa a bisa DIARIO.



Ayera señor Bernabe Kelly a celebra su di 102 aniversario na Hunze Mari-stella. Gezaghebber Bislip a bishita señor Bernabe y a expresa palabranan di felicitacion. Diputado Grace Bareño tambe tabata presente pa felicita e cumpleaño, cu ta gusta conversa y a demostra di tin un memoria excelente. Tabata presente ayeramainta tambe Comisario interino di Polis, señor Walter Kramers, y e jefe di RVD, señor Tommy Leest.